

## NAMIBIA SENIOR SECONDARY CERTIFICATE

**FIRST LANGUAGE THIMBUKUSHU ORDINARY LEVEL**

**4112/1**

PAPER 1 Reading and Directed Writing

2 hours 30 minutes

Marks 70

**2020**

Additional Materials: Answer Book

### INSTRUCTIONS AND INFORMATION TO CANDIDATES

- Write your answers in the Answer Book provided.
- Write your Centre Number, Candidate Number and Name in the spaces on the Answer Book.
- Write in dark blue or black pen.
- Do not use correction fluid.
- Answer **all** questions.
- Pay attention to spelling, punctuation and sentence structure.
- The number of marks is given in brackets [ ] at the end of each question or part question.

### MARAWERO NOMAPATHWERERO KWAMUHATI KUMAKONAKONO

- Tjange mahuthero ghoye muMbapira dhoKuhuthera edhi hana tapa.
- Tjange Nomora dhoDyango, Nomora dhaMuhati Kumakonakono noDina paMbapira dho Kuhuthera.
- Tjange nokatjangitho kothinadiwuru ngambi kokeru.
- Wa rughanitha thidhingununititho thomeyu-meyu.
- Huthe mepwero **ghomaheya**.
- Kuthotera kumashashero, yitoyadimukitho nomarongathaneno ghoyighamba.
- Mapenda gha pwa kutura mutuhaki [ ] kughuhura gho kehe dipwero ngambi mutara ghodipwero.

This document consists of **6** printed pages and **2** blank pages.



Republic of Namibia

**MINISTRY OF EDUCATION, ARTS AND CULTURE**

## MUTARA A

Toye thithimwetwedha no huthe mepwero agha sho gha ka rande ko.

### Thitoyamingwa 1

#### Thihonga tho kuhurera

“Thihonga tho kuhurera” ne thituritha po thomukangindanginda kaAlsace Lorraine muFrench, opa ha mu pumangedhire France hakayita hokudhuma Thindoyitji hodina Prussian, muyita yaFranco-Prussian, 1870 –1871. Thithimwetwedha thi kwa thi tjangire Alphonse Daudet, ene kuna thi kamununa pano.

Mathikuthiku gho ne na fungurukire maranga shemwa kushure karo na kudhekere yo ka ni harukera, thikumenena po ne pamurandu wamuhongi wetu Mukadikuto Hamel oyu gha tu tongwerire eshi ñanyi gha ka tu kona-kone kahongandimi koThifurendji, karo me ne mbadi na dimukire ñando dho kutangerera dho kuhatera ko. Paruvedhe rumweya na ghayarire yira ni kuyumuke ni ka fere mo ngambi mudiyaana na konda diyuwa dyodihe. Diyuwa dya karire ghuyenyu shemwa no kukenga muya ne keve-keve. Yinyunyi yoghere wimba pamaghowa, nomudipya dyokumughongo ghongeshefa dho kutetaghura yikunyi, oku hakayita waPrussian ne pakudjavura. Yithinganyekera yoghomakonakono ghokahongandimi mbadi ya karire yinu yo kutjimapitha, ene na kutupire ni ka gha tjange, podigho na tambukerere kushure.

Apa na poghorokire diyugho dyomakonganeno mudoropa, na monine dikongi dyawanu kughutho ghodimbangu dyo kurameka madhi ghombudhi. Myaka dhiwadi dhiya dhina ka pita po nga tu yuveranga mbudhi dhodhiyi yira mayongarithero ghoyita, ditjango dyawangawana awa ha thinenekire hengene muGhukayita, nomarawero ghaMukuru wawamaporitha, gho na ghayarire kwange ghu kwipura ni shi shayekera po, “Yinye yina kuhokoka?”

Munyima gho na tambukire thinyunguru. Mufuri yirughanitha, mukevereri, oyu gha karire po nokangangwena kendi, ghu toya madhi ghombudhi, gha ni kughererire eshi, “Wa tambukerera, mungawana, ñanyi ghu ka kume kushure, noruvedhe-vedhe.” Na ghayarire twame yame ghana kuheka, gho na ka kumine mukakwinino kaMukadikuto Hamel ghu hethangana.

Edi nga yi karanga thingi thomaruedhe ngeshi shure dhina yandhuruka, ngo kuyuverera muyitarata: muyoyo gho kukoka no kuhutha mo matishi noyihonga yo kuhukuruka mumakuyuvero ghombokapwe, ghu shindhuka thikuma, opo twe pakughapikura tu yuve thiwana. Diyuwa dyo ne ka tegherera kokuheya nyiki! Na taterere kukayoghototo kowoma oku ghana kuyendaghura mukadikuto Hamel ghu mwashaghura thikuma nothipayuritho thendi thothikuru patishi, kughutho gho kutjirera kutishi wange yo shi ni mono, ene fura odyo diyuwa yoyiheya ya konine kukara nyiki yira mathikuthiku ghoShundaha. Pakambenene kopathitarero thondhugho na kambekedhire hakangonda dhange wahe kare mumango ghawo noMukadikuto Hamel ghu yendaghura yenda-huka, ene mbadi gha karire nothipayuritho thendi thothikuvo muñokona. Na konine keho kuyandhurura dikorogho ni ngene oku wahe hana hungumana payipuna yawo. Kukona ghu thinganyeke eshi ngepi di na shururukire no kuyapa thothimwe.

Ene mbadiko yi ya hokokire. Mukadikuto Hamel gha ni monine no gha ghambire nange mudiwi dyo kughomoka eshi, “Yende kudyango dyoye wangu, mwanuke Franz. Momu tu shombeke kunyima dhoye.”

Na reghire thibendji no ka hungumana kutishi wange, ndani kaghuvudhe! Momu ka kathumuko keho eshi muhongi wetu gha shupatire nduruvaki wendi shaghuwa ghothinamahako, hembe wendi ghoghurenga nokahutjighana kokurwedhima kokeru, yoyiheya ha fumena po yitjanga. Ya monekire eshi shime gha shemwa kuyishupata rumweya nopakukengurura makwirero temba endi pakutapera ndjambi ko wa ha myaghedha muyikuhonga yo kukuthigha-thigha. Kutunditha ko yo, shure dhodhiheya dha monekire mwamonamo, karo mbadi pa karire ko yihekitha endi yipepaghura. Ene thinu thimweya thi tha ni tetukithire po thikumenena ne pakumona yibendji yokunyima oyi ya karanga mukunguru, hakamukunda mudingi dyawo hana hungumana po yira yoyatwe: mukuru Hauser, nohutji wendi ghomashongahatu, meya yu gha shwagha mo, mutapi mbudhi yu gha shwagha mo, nohamweya kenge yo. Keheyuno gha monekire eshi ghana ndundumena, oro ruvedhe Hauser gha piturire mbapira dhokare, ha dhi peteka kughuhura, munyima gha dhi yandhurure ghu dhi kwaterera pamanwi nomakende ghendi ghashaghuwa agha gha fughekire pamapepa ghadho.

Oku ame muthitetu thoyoyihe yi, Mukadikuto Hamel gha ndjundjumeke thipuna thendi, yira dyodi gha ghambire nange pamutango, gha ghambire karo nodiywi dyo kukuhema eshi, “Mwahanange, othi thothihonga tho kuhurera nina kumuhonga. Matokwero ne kuna tunderera kuBerlin eshi Thindoyitji pithatho sho ha honge mumashure ghomuAlsace Lorraine. Muhongi ghondimi dhoThindoyitji ñanyi gha kwiye peghundha. Othi ne thothihonga thenu tho kuhurera mundimi dhoThifurendji. Na shana mu tegherere shemwa.”

Mañando gha ne gha karire mushoro kukwange. Mawe ghuthighana, napo yo nga ha rameka pamakuma ghodiyugho dyomakonganeno mudoropa! Padimbangu dyombudhi.

Thihonga thange tho kuhurera thomundimi dhoThifurendji! Pashanye? Ya ni kwangire shemwa yo kutwetha kutjanga! Mbadi karo mbo ni kuhonga. Na kona kushaghekera popo! Mawe, pashanye na pirere kukwata yikuhonga, mudyango dyoyikuhonga ame gho nga ni yendanga kughuyambi ghomahonyi ghoyinyunyi, no ka pepaghura yo kutjwema kukakuro kudyango dyomakerekeshe paKufu! Mambapira ghange gha gha karire ndhanyi-ndhanyi ruvedhepita noghuremu kughashimba-shimba, thikuma po ne dhokahongandimi nodhoyihokoka yopakare yawapongoki, gha karire keho shi hashere wange hokare awa na kona kuyakunuka, ene na shwena kuyitambura. Namukadikuto Hamel naye kemo, odyo dighano eshi kuna kutuyakunuka, mbadi mbo ni mu mona karo, yinu yi ya ni ningithire ni vurame thipayuritho thendi thothikuvo thishokuru no di gha karire katjimaghana.

Mawe katughuru pakunyanda? Pamurandu ghothihonga tho kuhurera yodigho ghana shupatera yishupata yendi yoyiwa kuShundaha. Apano keho na tjwathana eshi pashanye ghana hungumanena mayami kunyima dhongonda. Pamurandu eshi nawo mbadi yina wa shambereritha eshi mbadi ha yenda kushure thikandho thothire thikuma. Dhondhira dhawo dho kumutumera muhongi wetu kumyaka makumi mane dhi ghana tu rughanena mughushemwa no mu kuneghedha fumwa dhawo kuditunga di dina piri kukara dyawo.

- 1 Huthe mepwero 1 (a) kate ku (c) pakutjanga thitjanga othi thina kukuwa nodihuthero. Thitamedhi: (a) **A**.
- (a) Yinu munye yi gha shanine gha rugthane Franz mudyango dyo kuyenda kushure?  
**A** Ka shanaghura yinyunyi mumuthitu.  
**B** Ka djavura nawakayita.  
**C** Kukuhonga kahongandimi koThifurendji.  
**D** Ka kuhoreka mudiyana. [1]
- (b) Thithimwetwedha thi kuna yandjurura yo kuhatera kutokotoko dhi ha yuvanga hanu ngeshi ...  
**A** muhongi wawo hana mu dhiruthera kushure dhimweya.  
**B** hahongwa mbadi karo hana kuyendanga kushure.  
**C** hahongwa mbadi karo hana kukuhonga ndimi dhawo.  
**D** mukunda ghuna kuwanekera nodidhongiri. [1]
- (c) Thiipi po poyino ethi thina kushingonona thiwana mañando ghomushoro muyikaramo yomuthithimwetwedha?  
**A** Kuhekitha.  
**B** Kunyanyukitha.  
**C** Kundhanyaghukitha.  
**D** Kutukukitha. [1]
- (d) Mighuma munye dhi gha tatere kuyuva mwanuke Franz opa gha kokere kushure modyo diyuwa? Tarangedhe mahuthero **mahatu**. [3]
- (e) Opa gha yuvire Mukadikuto Hamel ghana kughamba, yinu munye gha nongononine Franz yokuhatera kumbudhi dhopadimbangu? Tape mahuthero **mawadi**. [2]
- (f) Ngepi di ghuna kutjindji ghukaro waMukadikuto Hamel modi diyuwa kutwara di ghana kumutjangurura Franz? Tape mahuthero **mawadi**. [2]
- [10]
- 2 Kuture eshi yowe Franz mothi thithimwetwedha. Tjange katjangwa oka sho ka ka moneke mukorambudhi muthiparatjangwa “kanwa kungwara muthitetu.” Owe ghomukurughana, ghuna kengurura koyi ghuna kuhongera po modi diyuwa hana shingonona muthithimwetwedha. Rughanithe mbudhi dhi ghuna yuvu muthithimwetwedha gho tjange ko yoyingi mumañando ghoye ghothinda.
- Ghure ghokatjangwa koye komukorambudhi ne ka kume kumañando **200 – 250**. [20]

## MUTARA B

Toye thitoya thino kwishi munyima gho huthe mepwero agha hana ka kwipura ko.

### Thitoyamingwa 2

#### Makwerero ghomungwangu

Na pindukire kumughuma ghoviri edhi na turire kumbadi dhoghudidi wange mundhugho dho kuhira. Muyoyo kundhanyi! Shime mumangandhe-ngandhe, ha ni thi dhimitha kwange ni katheke po tuminute tongandji. Yashemwa name na roghera mukaye komumakuhongo ndi, endi ngwa kuna yendanga kumangonda kuñurushure ni ka rumbere yighamba yomakuhongo yawamaprofesa? Pawa ne ngo na yendi vene ni ka korere ghushoko oghu ghuna kurenda-renda mumango ghomakungero, ni ka ghayare ghu kuhutha. Ghushoko ne djengu ghu di, kukona kwiya no kuhuka popa ghuna shanena. Matjwathaneno ghawo ghokaye aka ka wa dhumutwedha ne gha kuthigha thikuma noghohanu. Dighano dyo kuvumwa dya ni towarire, ene ha ni di kandura po karo wangu-wangu. Mbadi na yi tjimapore yo kunyetuka ngonda dhimweya.

Ghupira kukudhugha-dhugha, ha ni pinduka kwange paghudidi, kungena mundhugho dho kuyoghanena ni ka kukwarakashe no ka shwagha mo thothimwe, gha hana kuninongonona keheyuno. Na kuthukire wangu no kutambukera kudyango dyomadhineno ghobesa. Ndjato dhange kuna dhi wana ne patishi yu nga ni dhi thighi peghundha. Mbadi nga ni dhi kweyurura. Mbadi na kuroghithere kuthihonga.

Apa na shwaghire panunda na nongononine eshi mathikuthiku ghomuvumbi. Kudikita, kwetha, kapwi nodihuruhuru ya tjindjire mupepo. Ha ni huka karo mundhugho ni ka gwavure ditangwa dyange. Makutjindjero ghomupepo ghokaghonda kaKupembona, yinu yayo, dyo na ghayarire. Na tambire mundhira dho kumadhineno ghobesa oku na hedhumuna mutjima. Apa na thikerire kudyango di na yi monine pamarupara ghawamweya eshi besa yu ne ghana hurerera, thika dyodi ya hokokanga kehe pano. Maranga gha ne gha karire fiyaghudhi kukwange, dyo na yi turire.

Fiyaghudhi, na ka kumine muravedhe kuthihonga thoghundjimi. Profesa wetu ghothihonga thi, Gurmail Singh, munyanyami nomutamenedhithi mwene. Yoyimango po eyi ya dhirire kukuyenda noyitaterera yendi ne ghukaro ghomungonda dhetu. Mbadi nga vumwanga ngambi kuhurera kukehe thihonga thendi, ene diyuwa dyo ne mbadi gha monekire paravedhe. Wingi wawayendhange mungonda awa nga ha tjapereranga panunda dhongonda ngeshi hana hurera ne hana tumera fiyaghudhi dhawo, oku wano hamweya pakuhethera ghu ghamba eshi, “Kaghuvudhe!” Kapupi kamanana apa gha nengenine Gurmail Singh mungonda gha monekire eshi mbadi yodighe yu twa dimukire. Gha kashire, kukona kuyimona, ene mbadi ghupata ngambi yinyeghenya. Yishamberera yomurupara rwendi ya dhongonokire mo. Twa yi dimukire eshi po yi di yi nepa. Kukona yi kare eshi ghukaro wetu ghuna kumana mo, yo yina kukukutithanga yihonga yendi. Mumuhingo ghoghunongo, ruhakitho nomutjima gho kuyandhurukera, gha tangire thihonga thendi ghu tu dimukitha eshi edi ne dyodiyuwa dyendi dyo kushagheka thirughana thi. Gha tangire kutuomba mathigherero yofotji yofotji, yira murandu wendi ghoyi nga tu ghu. Twa tongorokire meho ghetu, ene ya kangire oku sho tu kengere no oku sho tu kuhoreke. Twa shururukire. Rutongoritho rwendi mumuhingo ghoghughomba rwa

twire kumitjima dhetu yira dimende. Mitjima dhetu dha shaghekire tango kupomba manyinga, ene tokotoko dha karire po. Tokotoko mbadi twa konine kudhikhoreka. Twa yi dimukire eshi tuna ghu.

Munyima dhokapupi kamanana kothipore, gha henyine kwendi kudikwere no kudhodhinga po thiparatjangwa thothihonga tho kuhatera kumayeyukero ghoyighuritha nomaghurumukero ghomudyo ghomasherenyi muditunga. Thihonga gho tha tamekire, thika dyodi gha yi kuhongera. Gha hukerire karo mughukaro oghu twa mu dimukithire, muhongi ghomuwa, thiñeke, noghokamanakandongo. Gha tjwathanithire thihonga thothiheya mughuhunga nomundhira dhoghuredhu, kate ka tu thigha twaheya tunwa kungwara, thika edi ya hokokanga yikandho yoyiheya. Ruvedhe rwa tjirire, apa nga tu yi vurukera ne kuragha ghana kuturagha, ghu tu shanena fiyaghudhi kughutho, no ka shwagha muthipore. Twa kuyuvire thihonyi nomurandu wetu mu kuhuritha thirughana thendi thoghuhongi mumuhingo ghoghuyi.

Aye ne yoghumwe twa hakire thikuma mughudhindo no twa kutekerire. Twa yi dimukire eshi twa mu yipithere, podiyo shi twa kona kuyiroghuthurura. Tu ghongawedhe manyinga twa kumughurere profesa wetu thitapa? Ghungwa twa kumughurere mbapira dhothikhuhonga thoghundjimi twa kumupe, thineghedhitho thofumwa kumaghano ghendi agha gha tu yarekera. Mbadikemo, ngo mbadi ya kumunyanyukitha, yoyishi gha yi dimukire eshi twamweya mungonda dhendi ne mbadi twa tjwathanine thikhuhonga thendi. Thikarata thomuraghitho? Mbadi dighano dyodiyi, ene ñanyi tha kukare ghuthorokoto mu kukondjera kutjanga mo yighayara noyikuyuva yetu. Munyima dhomuyoyo ghoyikuyonga twa tokorire kutjangera muhongi wetu mbapira dhomuraghitho. Hayendhange awa ha yi nongononine eshi yame na hakire no kukutekera thikuma muhongi wetu, ha ni rawerire eshi yame na kona kudhitjanga mbapira dhi. Thirughana kughukukutu! Dyo na ghayarire. Kunyiima dhoruvedhe na ka hungumanine pithange mudiyugho dyothungungu. Padipepa dyange dyo kutjangera pemanine ngenyu thighamba ethi na tjangire po eshi “Mukadikuto”...

*(Kuna tundu muSpice of Life by Chitvan Singh Dillon The Hindustan Times, 12 May 2015)*

- 3** Kamunune makuwero ghopakatji kawapepi noyikuyuva yawathimwetwedhi thika dyodi hana kuyishwaghitha muyitoyamingwa yiwadi.

Ghure ghomakamweneno ghoye ghu kume ku **200 – 250**.

**[20]**

- 4** Yowe muthimwetwedhi gothithimwetwedha thi. Rundurure mbapira dhomuraghitho kwaprofesa wenu. Rughanithe dighano dyomuthitoya no kudikuritha mughufughuri mumaghano ghoye gothinda.

Ghure ghomañando ghombapira ghu kume ku **200 – 250**.

**[20]**

**BLANK PAGE**

**BLANK PAGE**

